

Samþykkt fyrir Brunavarnir Rangárvallasýslu bs.

I. kafli

Almenn ákvæði.

1. gr.

Byggðasamlagið heitir „Brunavarnir Rangárvallasýslu bs.“, kt. 681098-3059. Heimili þess er að Hlíðarvegi 16, Hvolsvelli. Slökkvistöðvar eru á Hellu og Hvolsvelli.

2. gr.

Aðild að byggðasamlaginu eiga eftirtalin sveitarfélög: Ásahreppur, Rangárþing eystra og Rangárþing ytra. Önnur sveitarfélög geta orðið aðilar að byggðasamlaginu með samþykki allra aðildarsveitarfélaganna. Eignarhluti aðildarsveitarfélaga er í samræmi við fasteignamati húseigna í sveitarfélögunum 1. desember ár hvert.

II. kafli

Hlutverk og valdheimildir.

3. gr.

Hlutverk byggðasamlagsins er að annast lögbundin og samningsbundin verkefni. Felst það einkum í að vinna að forvörnum, eftirliti og veita fyrstu viðbrögð til að vernda líf, heilsu fólks, umhverfi og eignir og afla nauðsynlegra tækja í samráði við Mannvirkjastofnun.

4. gr.

Sveitarstjórnir aðildarsveitarfélaganna hafa ákveðið að framselja til byggðasamlagsins vald til ákvörðunar og framkvæmdar lögbundinna skyldna slökkviliða í samræmi við ákvæði laga um brunavarnir nr. 75/2000, með síðari breytingum, og annarra laga og reglugerða sem kveða á um verkefni slökkviliða.

Valdheimildum byggðasamlagsins er nánar lýst í samþykkt þessari. Stjórn byggðasamlagsins hefur ekki umboð til að skuldbinda aðildarsveitarfélögum umfram það sem getið er um í samþykkt þessari.

Byggðasamlagið skal fylgja ákvæðum sveitarstjórnarlaga nr. 138/2011 um meðferð mála, skyldur og réttindi stjórnarmanna, starfslið, fjármál og stjórnsýslueftirlit auk þess að fylgja öðrum almennum reglum sem gilda um framkvæmd verkefna sveitarfélaga.

5. gr.

Leita þarf samþykkis allra sveitarstjórnar aðildarsveitarfélaganna við gerð samninga við einkaaðila um þjónustustarfsemi, sbr. m.a. 100. gr. sveitarstjórnarlaga. Jafnframt þarf að leita samþykkis allra sveitarstjórnar aðildarsveitarfélaganna við gerð samninga við einstök aðildarsveitarfélög um að þau taki að sér afmarkaða þætti í starfsemi byggðasamlagsins. Að auki skal leita samþykkis allra sveitarstjórnar aðildarsveitarfélaganna varðandi gerð samninga um ný verkefni byggðasamlagsins.

III. kafli
Stjórnskipulag.

6. gr.

Aðildarsveitarfélögin tilnefna hvert um sig einn aðalmann og einn varamann í stjórn byggðasamlagsins að afloknum sveitarstjórnarkosningum og er kjörtímabil stjórnar það sama og sveitarstjórnar. Stjórnarfíltruar skulu vera aðalmenn í sveitarstjórnnum aðildarsveitarfélaganna. Stjórnin skiptir með sér verkum á fyrsta fundi að afloknum sveitarstjórnarkosningum og skal sá fundur haldinn eigi síðar en 1. ágúst. Fulltrúi fjölmennasta sveitarfélagsins boðar til fyrsta fundar og stýrir honum uns formaður hefur verið kjörinn.

7. gr.

Stjórn byggðasamlagsins heldur fundi svo oft sem þurfa þykir og að jafnaði eigi sjaldnar en fjórum sinnum á ári. Halda skal stjórnarfund óski tveir fulltrúar í stjórn eftir því. Formaður stjórnar boðar til stjórnarfunda og stýrir þeim. Stjórnarfundur er ályktunarhæfur ef meirihluti fulltrúa í stjórn er mættur til fundar.

Afl atkvæða ræður afgreiðslu mála á stjórnarfundum.

Ákvarðanir sem stjórn tekur eru fullnaðarákvarðanir, en um endurupptöku einstakra mála fer eftir ákvæðum 24. gr. stjórnsýslulaga nr. 37/1993. Fundargerðir stjórnarfunda skulu sendar aðildarsveitarfélögnum.

8. gr.

Hlutverk stjórnar er að annast daglegan rekstur byggðasamlagsins í samræmi við ákvæði samþykktar þessarar, að öðru leyti en því sem hún felur slökkviliðsstjóra að annast fyrir sína hönd.

9. gr.

Stjórnin ræður slökkviliðsstjóra til að stýra daglegum rekstri og gerir við hann ráðningarsamning þar sem kveðið er á um starfskjör, réttindi og skyldur í starfi.

Slökkviliðsstjóri annast daglegan rekstur byggðasamlagsins í samræmi við gildandi lög, reglur og ákvarðanir stjórnar. Stjórnin samþykkir starfslysingu þar sem nánar er fjallað um verkefni slökkviliðsstjóra. Slökkviliðsstjóri situr fundi stjórnar með málfrelni og tillögurétt.

Slökkviliðsstjóri semur drög að fjárhagsáætlun fyrir stjórn og reglur um útköll í samráði við stjórn þannig að sem mest öryggi fáist við að koma boðun til slökkviliðsmanna.

Slökkviliðsstjóri ræður slökkviliðsmenn og annað starfsfólk byggðasamlagsins í samráði við stjórn og sér um þjálfun þeirra. Slökkviliðsstjóri gerir ráðningarsamninga við starfsfólk þar sem kveðið er á um starfskjör, réttindi og skyldur í starfi.

IV. kafli
Rekstur og fjármál.

10. gr.

Stjórn byggðasamlagsins gerir fjárhagsáætlun fyrir byggðasamlagið ár hvert sem uppfyllir skilyrði sveitarstjórnarlaga og sendir sveitarstjórnum aðildarsveitarfélaganna til staðfestingar eigi síðar en 10. október ár hvert. Ef sveitarstjórn einhvers aðildarsveitarfélags staðfestir ekki fjárhagsáætlunina skal stjórn byggðasamlagsins fylla aftur um áætlunina og senda nýja fjárhagsáætlun til staðfestingar.



Stjórn byggðasamlagsins skal hafa eftirlit með því að rekstur sé í samræmi við fjárhagsáætlun.

Stjórn byggðasamlagsins getur ekki skuldbundið aðildarsveitarfélögin umfram það sem kveðið er á um í staðfestri fjárhagsáætlun byggðasamlagsins. Ákvarðanir um lántökur, húsnæðismál eða mál er varða útgjöld umfram fjárhagsáætlun byggðasamlagsins þarfnast staðfestingar frá sveitarstjórnnum allra aðildarsveitarfélaganna.

11. gr.

Tekjur byggðasamlagsins eru mánaðarleg og eftir atvikum árleg framlög aðildarsveitarfélaganna. Einnig geta komið til aðrar tekjur vegna sölu á þjónustu sem tengist verksviði byggðasamlagsins eða annarra skyldra þátta.

Stjórn byggðasamlagsins er heimilt að setja gjaldskrá á grundvelli laga um brunavarnir, s.s. vegna eldvarnaeftirlits. Upphæðir þjónustugjalda í gjaldskrá skulu taka mið af kostnaði við þjónustu og einstök verkefni og skulu þjónustugjöldin byggð á rekstraráætlun þar sem rökstudd eru þau atriði sem ákvörðun þjónustugjalda byggist á, enda mega þjónustugjöldin lögum samkvæmt ekki vera hærri en sa kostnaður.

Að því leyti sem tekjur samkvæmt gjaldskrá standa ekki undir kostnaði við rekstur byggðasamlagsins skal kostnaðinum skipt milli aðildarsveitarfélaganna eftir fasteignamati húseigna í sveitarfélögunum 1. desember árið á undan. Þó skulu húseignir orkuvera á hálendinu ekki reiknast með við skiptingu kostnaðar.

Mánaðarleg rekstrarframlög eru greidd fyrirfram til byggðasamlagsins í samræmi við fjárhagsáætlun þess.

12. gr.

Aðildarsveitarfélögin bera einfalda ábyrgð á fjárhagslegum skuldbindingum byggðasamlagsins en innbyrðis skiptist ábyrgðin í hlutfalli við íbúatölu.

13. gr.

Stjórn byggðasamlagsins staðfestir ársreikninga byggðasamlagsins fyrir ár hvert og miðast reikningsárið við almanaksárið. Ársreikningar byggðasamlagsins skulu endurskoðaðir af löggiltum endurskoðanda eða endurskoðunarfyrirtæki sem stjórn þess ræður til starfsins. Senda skal fullgerðan ársreikning, staðfestan af stjórn byggðasamlagsins og áritaðan af endurskoðanda, til allra aðildarsveitarfélaga fyrir 15. apríl ár hvert.

14. gr.

Sveitarstjórnir og endurskoðendur aðildarsveitarfélaganna eiga rétt á aðgangi að öllum gögnum um rekstur og stjórnsýslu byggðasamlagsins.

V. kafli Ársfundir.

15. gr.

Ársfund byggðasamlagsins skal halda einu sinni á ári að jafnaði á vorin. Stjórn byggðasamlagsins ákveður hvar og hvenær ársfundur er haldinn en formaður stjórnar byggðasamlagsins boðar til ársfundarins.

Rétt til setu á ársfundi eiga kjörnir aðalmenn í sveitarstjórnnum aðildarsveitarfélaganna, framkvæmdastjórar aðildarsveitarfélaganna, auk lykilstarfsmanna byggðasamlagsins

B. A.

og aðildarsveitarfélaganna. Stjórn byggðasamlagsins getur ákveðið að bjóða öðrum aðilum til fundarins með hliðsjón af því hvaða mál eru tekin á dagskrá.

Á ársfundi er gerð grein fyrir rekstri byggðasamlagsins, fjárhagsáætlun og öðrum málum sem stjórn byggðasamlagsins ákveður.

VI. kafli
Breyting á samþykkt, slit og gildistaka.

16. gr.

Breytingar á samþykkt þessari þarfnað samþykkis allra sveitarstjórna aðildarsveitarfélaganna. Samþykkt þessa skal endurskoða ef eitthvert aðildarsveitarfélaganna telur ástæðu til þess, s.s. ef breytingar verða á lögum og reglum sem varða verulega starfsumhverfi byggðasamlagsins.

17. gr.

Aðildarsveitarfélagi er heimilt að ganga úr byggðasamlagi þessu með tveggja ára fyrirvara. Um úrgöngu sveitarfélags gilda að öðru leyti ákvæði 95. gr. sveitarstjórnarlaga.

18. gr.

Tillaga um slit byggðasamlagsins skal samþykkt af a.m.k. 2/3 hlutum sveitarstjórna aðildarsveitarfélaganna. Um slit byggðasamlagsins gilda að öðru leyti ákvæði 95. gr. sveitarstjórnarlaga.

19. gr.

Samþykkt þessi öðlast gildi við staðfestingu sveitarstjórna aðildarsveitarfélaganna. Jafnframt falla úr gildi samþykktir byggðasamlagsins frá 6. júlí 1998.

Ákvæði til bráðabirgða

Þrátt fyrir ákvæði 6. gr. er það ekki skilyrði að fulltrúar í stjórn byggðasamlagsins séu aðalmenn í sveitarstjórn á yfirstandandi kjörtímabili sveitarstjórna. Þetta skilyrði í 6. gr. öðlast því gildi í kjölfar sveitarstjórnarkosninga 2018.

Hvolsvelli, 8. desember 2016

F.h. Ásahrepps

F.h. Rangárþings eystra

F.h. Rangárþings ytra



Sveitarstjóri Rangárþings eystra